

# Per l'integrasiun senza in sulet votum

Suenter 37 onns è l'Uniun chantunala da veterans istorgia. Da nov appartegnan ils passa 1000 commembers e commembras a l'uniun superiura che reunescha ils chantadurs e las chantaduras da chant dal Grischun. Anc resta Gion Darms in onn president dals veterans e veteranas da chant. La davosa dieta da l'uniun ha lieu a la fin d'avust 2023 a Trun.

GION NUTEGN STGIER/FMR

Pervi da las mesiras cunter la pandemia ha l'Uniun chantunala da veterans da chant gè da renunziar dus onns a la dieta annuala. Ussa ha quella gè lieu a Cuira ed ella è stada la penultima dieta. Preschents èn stads 160 veterans e veteranas da chant ed in bel dumber a giasts. Tranter quels era cusseglier guvernativ Jon Domenic Parolini e Lucretia Bärtsch, la presidenta da l'Uniun chantunala da chant dal Grischun. En moda cumpetenta ha Gion Darms, il president da veterans e veteranas da chant dal Grischun manà la dieta. Quella è sco adina stada plitost in inscunter empernaivel, uschè che las tractandas statutaricas èn stadas era questa giada secundaras.

«Veterans e veteranas a vegnan vinavant a s'entupar per ina dieta.»

Gion Darms, president da l'Uniun chantunala da veterans da chant



Sa legran da la fusiun, Gion Darms, Jon Domenic Parolini e Lucretia Bärtsch.

## Decisiun unanima

Ils davos dus onns è la suprastanza da l'Uniun chantunala da veterans da chant adina puspè s'occupada cun la successiun da suprastants e suprastantas e cunzunt cun l'avegnir da l'uniun che reunescha ils passa 1000 commembers e commembras che derivan da 78 chors. Uschia è er vegnida tematisada l'integrasiun da l'Uniun da veterans e veteranas da chant en l'Uniun chantunala da chant dal Grischun. Quella ha actualmain 4050 commembers e commembras che derivan da 125 chors. Presidenta è Lucretia Bärtsch. L'uniun tetgala chantunala onuritgescha er adina ils veterans e veteranas d'onur, quai che l'Uniun chantunala da veterans da chant fa er mintg'onni da la dieta a la fin d'avust. Quai vul dir che quella onorificaziun è vegnida fatga dapi il 1985 adina dublamain. Cun integrar veterans e veteranas da chant èn l'uniun

superiura èn da nov veterans e veteranas da chant «sut in tetg». Ultra da quai vegnan las annuzias dals novs veterans e veteranas d'onur registradas en in lieu. Er ils veterans e las veteranas da chant dals chors ch'èn betg pli existents restan vinavant commembers e commembras da l'uniun. Senza in sulet votum ed unanimamain han ils preschents e las preschentas decidi da far quella maridaglia. Vinavant vegnan veterans e veteranas a s'entupar per ina dieta, dentant senza tractandums statutarics. Persuenter duai la cumpagnia star cumplettamain en il center. Omadus suprastanzas èn dal reminent stadas d'accord da far quella integrasiun. La davosa dieta per veterans e veteranas da chant vegn ad avair lieu a la fin d'avust 2023 a Trun. L'organisasiun ha surprindì il Chor cecilian Trun. Organisà la dieta 2022 aveva il Chor viril Cuira cun Hanspeter Trepp a la testa. Ils salids da la citad da Cuira èn vegnids da Norbert Waser, il vicepresidente dal parlament da la citad.

## Veterans e veteranas tgiran la tradiziun

«Da pudair puspè chantar è da gronda valur per la vita sociala», ha ditg il minister da cultura grischun Jon Domenic Parolini, «per mintga chor èn veterans e veteranas da gronda impurtanza.» Els ed ellas cultiveschian dapi onns la tradiziun dal chant e dettian er vinavant quella a la generaziun giuvna da chant. «Veterans e veteranas da chant san er raquintar istorgias interessantas ed anecdotes singularas», ha ditg il cusseglier guvernativ. Ella haja grond respect da la lavur che vegnia da nov vitiers cun avair fatg quella fusiun, ha ditg Lucretia Bärtsch. «Da dar a la vita dapli dis nun è betg pussaivel, persunter da dar als dis dapli vita bain», ha menziunà Gion Darms. En quel senn saja er la fusiun da veterans e veteranas en l'uniun tetgala in fatg positiv. Undrads èn vegnids sco veterans d'onur 27 chantadurs e 9 chantaduras. Sa regurdads èn ils preschents er a lur 94 amis ed amias che han ils davos trais onns bandunà il mund da chant per ir en l'eternitad.